

Vun driveriver

erscheint auf www.lenauheim.de

monatliche
Erscheinung

Mai 2009

von *Helen Alba*

Heissi Hits – ob mer horche will, oder nit!

Ihr seid sicher schun mol mit so em weiss-lila Bus dorch Temeschwar kutschiert. Im Summer han die Busse Klimaanlage, im Winter Heizung. Trotzdem sin die Sitzplätzer in der kalt Johreszeit kalt, mer muss sich e Stuhlkisse vun derhem mitholle, wann mer sich do hinsitze will. Wann die Klimaanlage im Summer ingschalt is, do derf mer sich nit uf die vordre Plätzer sitze, weil des zieht em jo es Hern ausm Kopp un es is Gfahr, sich zu erkälte. Natierlich bezieh ich mich uf die ältre Leit, de Junge macht des wahrscheinlich noch nit vill aus.

Was mich bei so eener Fahrerei steere tut, des is die Musich. In manchi Busse geht es Radio, mer heert vleicht die Nachrichte oder Wettervorhersage. Doch villi Busfahrer han so e Kassetofon inschtalliert un die Musich schlaat Welle, is natierlich uf dem Fahrer sei Gschmack abgestimmt. Manchmol is rumänischi Volksmusich derart laut, dass es direkt steere tut. E anres Mol johlt e Manelist, die Texte vun de Lieder han weder Kopp noch Fuss. Ganz stark sin die heisse Hits mit Klopperei un Pfeiferei.

Manchmol schau ich mich runderum un kunschatier: de junge Leit scheint alles zu gfalle – es soll nor Musich sin. Die im mittlere Alter, was solls – sie kloppe de Takt mitm Fuss un denke sich ens derbei. Doch e alde Mensch, der is vleicht krank, der hat Sorche genuch un is nit grad so uf lauti Musich aus. Mer gsieht a Leit in Trauergwand un die han ganz bestimmt ke Luscht uf die Musich.

Doch mer kann de Fahrer a nit ufmerksam mache, weil die Busfahrer, die sin arich rawiat. Kenner will sich verschenne losse, oder noch gefährlicher! So horcht sich jeder – nolens, volens – die Busmusich an.

Un noch etwas! Mer sin e Schritt weiter Leit! In de Temeschwarer Verkehrsmittl tun die meischte Leit nimi ihre Karte zwicke, sie han so e neimodisches Abo, des misse se nor bei jeder Fahrt an de Dinger, die wu in de Elektrische, Busse un Firobusse angebrung sin, drantun for entwerte un schun geht die Piepserei los.

Es is de junge Leit jo hoch anzurechne, dass se sich e Abo kaafe. Des han se dann in ihrem Schriebiechl un brauche es gar nit rausholle. Sie schiewe des zamt mitm Schriebiechl vor dem Automat hin un her, bis es piepst.

E anri Sach, die wu ich gut fin, die wu ach fascht genau uf die Minut funktioniert, des sin die automatische un elektronische Ständre, die wu in villi Halterstelle angebrung sin. Sie weise sowohl die Uhrzeit, als ach es Verkehrsmittl an un es schreibt sogar, in wievill Minute die Elektrisch oder de Bus kumme tut.

Do han ich sovill rumgekrittelt – un ufmol is alles so einfach. Was awer de Leit noch immer e Dorn im Au is, des is die Tatsach, dass die eeni Elektrisch grad dann abfare tut, wann die anri ankummt. Zum Beispill bei der AEM Halterstell: die 9er Elektrisch kummt an un demoment fahrt die 4er ab un mer kann ere nohschaue un warte, bis die näkshti kumme tut. Doch hoffe mer, dass sich in dere Hinsicht a noch was tun werd!